



BILTEN

AGENCIJA ZA PREDŠKOLSKO OSNOVNO I SREDNJE OBRAZOVANJE

oktobar - decembar 2019. godine



Pet godina eTwinninga u BiH

U četvrtak, 10. oktobra 2019. godine, Agencija za predškolsko, osnovno i srednje obrazovanje održala je veliku konferenciju povodom pet godina eTwinning programa u BiH.



U proteklih pet godina odgojno-obrazovna zajednica Bosne i Hercegovine veoma zainteresovano i aktivno učestvuje u jednoj od najuspješnijih evropskih inicijativa u oblasti odgoja i obrazovanja – eTwinningu.

U eTwinning zajednicu uključeno je preko 470 odgojno-obrazovnih ustanova predškolskog, osnovnog i srednjeg obrazovanja te više od 1.400 odgojno-obrazovnih djelatnika Bosne i Hercegovine.

Uz proslavu 5. godišnjice eTwinning programa, konferencija, održana u zgradi Parlamentarne skupštine Bosne i Hercegovine, bila je prilika i da se nagrade najbolji eTwinners i eTwinning škole kao i da se predstave dosadašnji rezultati programa.

eTwinning program promoviše saradnju škola u Evropi korištenjem informacionih i komunikacionih tehnologija, pružajući podršku, alate i usluge te mogućnosti besplatnog i kontinuiranog online stručnog usavršavanja za nastavnike s krajnjim ciljem jačanja nastavničkih i učeničkih kompetencija kroz eTwinning.

Dobitnike nagrada, prezentacije i jedan mali dio atmosfere s proslave 5. jubileja eTwinninga u BiH pogledajte na sljedećim poveznicama:

- [Dobitnici nagrada](#)
- [Galerija fotografija](#)
- [Mediji o nama](#)
- [eTwinning u brojkama](#)

Prezentacije:

- [Pet godina eTwinninga u BiH](#)
- [eTwinning iz ugla eTwinera](#)
- [Dodjela nagrada](#)



PDW - eTwinning radionica za profesionalno usavršavanje predstavnika Državnih službi za podršku

Članovi Državne službe za podršku (DSP) eTwinning-a u Bosni i Hercegovini su učestvovali u eTwinning radionicama za profesionalni razvoj u Krakovu, Poljska, od 10. do 13. septembra 2019. godine. Na samom događaju je učestvovalo više od 100 učesnika iz 46 evropskih i okolnih zemalja.

 **U kakvom će društvu sutra živjeti naša djeca?**

 **Kako mogu u potpunosti učestvovati u društvu budućnosti?**

 **Odgovor se u velikoj mjeri nalazi u obrazovanju.**

Tokom Godišnje konferencije 2019. koja se održala u Mandelieu, Francuska, od 24. do 26. oktobra 2019. godine, više od 500 nastavnika iz cijele Evrope imalo je priliku da uvidi kako eTwinning može doprinijeti unapređenju različitih procesa u obrazovanju.

Također, konferencija je bila i svečanog karaktera jer su uručene nagrade za evropske projekte po određenim oblastima i uzrasnim kategorijama. Bila je ovo prilika da se pohvale najbolji projekti i nastavnici u Evropi koji učestvuju u eTwinning zajednici.

Zaključak Godišnje eTwinning konferencije je da sa prilagođavanjem sadržaja i motivacijom nastavnika još krupnijim koracima idemo ka ostvarivanju eTwinning aktivnosti, ali samim tim i jačanju i unapređenju nastavničke profesije.



Profesionalni razvoj i usavršavanja

Profesionalni razvoj kao cjeloživotna aktivnost!

Profesionalni razvoj je veoma bitna karika za unapređenje obrazovnih sistema u svim zemljama. Profesionalizacija nastavnika se nastoji poboljšati na osnovu različitih istraživanja o kojima smo pričali u prošlom broju našeg biltena (Istraživanje TALIS). Često se kaže da je nastava umjetnost. Prostor za kreativnost nastavnika se nalazi u fazi planiranja nastave (Ivić, Pešikan, Antić, 2003). Sve ovo navodimo jer je eTwinning upravo platforma koja nudi tu pripremu za podršku, nadogradnju, saradnju, komunikaciju i kreativnost nastavnika u svrhu pripreme učenika za naredne nivoe obrazovanja i život u 21. stoljeću.

Tematske konferencije su trodnevna događanja uživo na temu osvještavanja važnosti eTwinninga. Teme imaju naglašeni pedagoški aspekt. Glavni je cilj informisati i povećati osviještenost o važnosti eTwinninga. Izvode se na jednom od jezika kojim govori veliki broj stanovnika Evrope i to je uglavnom engleski jezik. Za učestvovanje na ovom događanju možete dobiti potvrdu.

Podsjetimo se još jednom šta su to kontakt eTwinning seminari 😊

Ko je organizator? Nacionalne službe za podršku u saradnji sa Centralnom službom za podršku.

Ko može učestvovati? Ciljana su publika svi nastavnici, eTwinneri. Tematske konferencije u prosjeku okupljaju do 200 učesnika.


Koliko to traje? 2-3 dana.

Gdje? Događanja su organizovana po cijeloj Evropi.


Kako da se prijavite? Obratite se svojoj [Državnoj službi za podršku](#).

eTwinning


Tako su i u ovom tromjesečju naši eTwinneri uz podršku Državne službe imali priliku da posjete Godišnju eTwinning konferenciju u Francuskoj i tri tematska eTwinning seminaru u Kopenhagenu, Beogradu i Beču.

 Ciljna grupa za odlazak na seminar u Dansku su bili aktivni eTwinneri, odgajatelji u predškolskim ustanovama. Dvije predstavnice BiH su imale priliku steći nova znanja i iskustva na temu: „New Pedagogies in Nurseries and Kindergartens“ i to od 30. septembra do 2. oktobra.




 Prilikom da prisustvuju seminaru koji se održao u Beogradu u periodu od 28. do 30. novembra 2019. godine imale su dvije predstavnice Bosne i Hercegovine. Tema seminaru je bila „Language teaching and learning through etwinning“. Seminar je bio namijenjen nastavnicima jezika koji podučavaju djecu uzrasta od 7 do 15 godina.



 Bosnu i Hercegovinu su predstavljala četiri nastavnika za odlazak na eTw seminar u Beč. To su bili našiiskusni eTwinneri. Seminar se održao od 11. do 13. decembra 2019. godine i okupio je veliki broj nastavnika na temu „Digital Competences & IT Didactics“. Sigurni smo da će znanja i iskustva koja su stekli na ovom seminaru imati prilike da iskoriste u svakodnevnom radu sa učenicima, ali i da svoja znanja i vještine podijele sa svojim kolegama.



eTwinning

 U prethodnom periodu mogli ste da pratite i da učestvujete na tri *online* događaja u organizaciji Državne službe za podršku te uz vodstvo naših istaknutih ambasadora i eTwinnera. Neke od tema bile su: Formativno ocjenjivanje, Postati aktivni građanin!, eTwinning, kako i zašto?

Ako želite ponoviti gradivo, možete preslušati i pogledati snimak vebinara na sljedećim linkovima:

Formativno ocjenjivanje

<https://eun2.adobeconnect.com/p7dlwekqxvna/>


Postani aktivan građanin

<https://eun2.adobeconnect.com/pykctoa06151/>

eTwinning, kako i zašto?

<https://eun2.adobeconnect.com/p7wan692nw3q/>



 I ove godine cilj nam je bio upoznati obrazovne vlasti o važnosti eTwinning platforme te kako motivirati nastavnike za učešće u profesionalnom razvoju koje nudi eTwinning program. Sastanci su održani 26. novembra u Ministarstvu za obrazovanje, nauku i mlade Kantona Sarajevo i 9. decembra 2019. godine u Zavodu za odgoj i obrazovanje u Grudama. Predstavnice Državne službe za podršku i ambasadorice eTwinninga u BiH su približile učesnicima važnost eTwinning platforme, objasnile mogućnost praćenja i motivacije nastavnika za učešće u programu. Sastanku su prisustvovali predstavnici obrazovnih vlasti.



Naši ambasadori su i u ovom tromjesečju imali priliku širiti važnost eTwinning ideje u nekoliko školskih zajednica. Opet uz pomoć i podršku Državne službe za podršku i u ovom periodu uključeno je još nekoliko odgojno-obrazovnih ustanova sa velikom zainteresiranošću za eTwinning program.

Prema statistici koju svakodnevno dobijamo, pratimo i obrađujemo, može se ustanoviti da imamo stalni napredak po pitanju različitih varijabli. Napredak je u broju prijavljenih odgojno-obrazovnih ustanova, povećanoj uključenosti nastavnika, velikom broju projekata i, što je najvažnije, ti projekti su iz mjeseca u mjesec po objektivnim indikatorima i deskriptorima sve kvalitetniji. Sve navedeno daje nam još veću motivaciju da radimo još više i značajnije na polju integracije eTwinninga u redovni nastavni proces.



Cilj nam je da nastavnici u Bosni i Hercegovini uvide prednosti jačanja svoje profesije, svog individualnog rada i napretka, što će kao krajnji cilj imati jačanje nastavničkih vještina i kompetencija te spremnost pristupu nastavnom procesu za nove generacije u 21. stoljeću.



U Novoj 2020. godini želimo svim eTwinnerima u Bosni i Hercegovini puno zdravlja, ljubavi, uspjeha i profesionalnog „eTwinnerskog“ napredovanja!!!

eTwinning

„Nemojte limitirati djecu samo na ono što ste vi naučili, jer djeca su rođena u drugom vremenu“.

Rabindranat Tagor

